

Si nos ta pertenece na reino di HesuCristo y si nos ta acepta Hesus como nos Rey, laga nos dun'E honor y gloria tur dia di nos bida. Si E ta Señor, laga nos haci e Cristo aki conoci den nos casnan di famia. Laga mayornan proclama

den nan hogar cu Cristo ta Rey di Universo, un Rey di Amor.

Carol Ph. Piternella

NOBENTA ANIVERSARIO DI SEÑORA DIGNA LACLÉ-HERRERA

Cu un celebracion di misa na Pro Catedral San Francisco, señora Digna Laclé-Herrera a celebra su di nobenta cumpleaños dia 1 di november ultimo.

Siendo un persona creyente y devoto, Digna kier a gradici Dios pa otro año di bida memey di famia y amistadnan y tambe pa e donnan cu el a ricibi pa comparti su conocemento cu su pueblo pa medio di literatura, cancionnan y articulonnan den prensa.

Pa un temporada Digna tabata un colaborado di E Noticia y tabata skirbi tocante topiconan social den nos comunidad y su spiritualidad.

Durante Segundo Guera Mundial tabata tin un scarsedad grandi di maestro y cu 16 año di edad Digna ta haya permiso di Gobernador Wouters pa traha como maestra.

Digna a sigui diferente curso pa completa su formacion como educador.

Ariba tereno social Digna a traha den diferente organisacion pa conscientisa hende muhe di su balor como ser humano y su igualdad di derecho mescos cu hende homber. Tambe Digna a contribui pa duna atencion na e derechonnan di mucha.

Na edad di 22 año el a cuminsa cu politica activo, pero ta te na 1979 el a postula su mes ariba un lista politico. Na 1986 el a haya e honor pa sirbi su pais como parlamentario den e prome Parlamento di Aruba.

Digna tin un amor grandi pa nos lenga Papiamentu cu e ta considera como un herencia di su mama, kende tabata conta su yiunan storia na Papiamentu. E temponan aya tabata prohibi pa uza Papiamentu na scol y Digna tabata

considera esaki un inhusticia. E ta lamenta cu hopi oportunidad a bay perdi cu e no por a hinca den su alumnonan e amor profundo pa Papiamentu cu e mes tabata sinti.

Rond di añanan setenta el a cuminsa publica algo di prosa y poesia den corant, revista y programa na radio. E obranan di Digna ta tocante naturalesa, storia pa mucha, storia di Pasco etc. Tambe el a skirbi letra pa diferente cancion pa mucha. Digna a traduci diferente cantica di Pasco for di Ingles y Hulandes na Papiamentu p'asina stimula nos muchanan canta na Papiamentu.

Un di su poesianan mas conoci ta "Mi Papiamentu" den cual e ta expresa su amor pa su lenga materno.

Un verso masha bunita ta "Na Papiamentu mi mama a canta canticanan pa mi por drumi, siña mi resa y gradici Creador pa tur e cosnan bunita rond di mi". E ta termina e poesia "Na Papiamentu lo mi contesta Señor na momento cu E bisa "bini awo".

Cu ayudo di UNOCA varios di Digna su obranan a keda publica manera "Proverbionan", "Mi Aruba bunita" y "Buki di poesia y storia". Otro publicacion di Digna ta "Buki di Pasco" cu storia, sketch, poesia y canticanan di Pasco. Manera e mes ta bisa: "un buki pa den tur cas por haci uzo di dje pa organisa nos fiesta di Pasco den circulo di famia".

Keto bay Digna ta activo y ta skirbi poesia sea ariba peticion of pa un ocasion special. Tambe e ta skirbi articulonnan critico den corant tocante un topico special.

Un bunita poesia religioso di Digna ta:

Riba e oceano di Bo Amor Señor
mi ta nabega yen di speransa
cu mi barco fragil y chikito.
Un dia lo mi yega y hancra
den e porta sigur, caminda
cu alegria lo Bo ricibi mi
den Bo brasanan habri.



Nos ta spera cu señora Digna Laclé-Herrera por sigui contribui na nos literatura na Papiamentu, specialmente pa muestra nos ariba e amor grandi y incondicional cu nos Creador tin pa cada un di nos.

Nilda Koolman.